



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

13.10.2021թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՑ-ԼՕ-2021/238**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ ՀՀ արդարադատության նախարարության քրեակատարողական
ծառայություն

Մասնակից՝ «Գոռ Շեկոյան» Ա/Ձ

Մասնակցությամբ՝ Գոռ Շեկոյանի

Գնման ընթացակարգի ծածկագիրը և առարկան՝

«ՀՀ ԱՆ ՔԿԾ-ԷԱՃԱՊՁԲ-21/3» ծածկագրով էլեկտրոնային աճուրդ,
քրեակատարողական ծառայողի շապիկ դատապարտյալների հանդերձանքի և
անկողնային պարագաների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ), ուսումնասիրելով Հայաստանի Հանրապետության ֆինանսների
նախարարության կողմից 13.09.2021թ.-ի թիվ 1/26-1/14790-2021 գրությամբ «Գոռ Շեկոյան»
Ա/Ձ-ին (այսուհետ նաև՝ Մասնակից) գնումների գործընթացին մասնակցելու իրավունք

չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ արդարադատության նախարարության քրեակատարողական ծառայության 07.09.2021թ.-ի թիվ 32.1/28140-2021 գրության հիման վրա, 13.09.2021թ.-ին «Գոռ Շեկոյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 13.09.2021թ.-ին:

14.09.2021թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2021/216 համարի ծածկագիրը:

28.09.2021թ.-ին և 13.10.2021թ.-ին նշանակվել և հրավիրվել են նիստեր:

Գործի քննությունն ավարտվել է 28.09.2021թ.-ին և Բողոքներ քննող անձի որոշման հրապարակման օր է նշանակվել 13.10.2021թ.-ին:

2. ՀՀ արդարադատության նախարարության քրեակատարողական ծառայության ներկայացրած փաստերը և դիրքորոշումը.

ՀՀ արդարադատության նախարարության քրեակատարողական ծառայությունը 07.09.2021թ.-ի թիվ 32.1/28140-2021 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«ՀՀ ԱՆ քրեակատարողական ծառայության կարիքների համար 2021թ. ընթացքում դատարարության հանդերձանքի և անկողնային պարագաների ձեռքբերման նպատակով, էլեկտրոնային աճուրդի ձևով, հայտարարվել է «ՀՀ ԱՆ ՔԿԾ-ԷԱՃԱՊՁԲ- 21/3» ծածկագրով գնման ընթացակարգ, որի գնահատման ընթացքում գնահատող հանձնաժողովը N 12 չափաբաժնի մասով հաղթող մասնակից է ճանաչվել «Գոռ Շեկոյան Էդուարդի» Ա/Ձ-ին:

Նշված ծածկագրի N 12 չափաբաժնի մասով ընթացակարգի անգործության ժամկետն ավարտվել է 17.08.2021թ.-ին ժամը 00:00-ին: Հաղթող ճանաչված մասնակից՝ «Գոռ Շեկոյան էդուարդի» Ա/Ձ-ին պարվիրաբուի կողմից պայմանագիր կնքելու ծանուցումը և կնքվելիք պայմանագրի նախագիծն, էլեկտրոնային համակարգի միջոցով, ուղարկվել է 17.08.2021թ.-ին՝ անգործության ժամկետի ավարտից անմիջապես հետո: «Գնումների մասին» ՀՀ օրենքի 36-րդ հոդվածի 3-րդ կետի համաձայն, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծը ստանալուց հետո՝ 10 աշխատանքային օրվա ընթացքում չի ստորագրում պայմանագիրը, ապա նա զրկվում է պայմանագիրը ստորագրելու իրավունքից: 01.09.2021թ.-ին լրացել է «Գոռ Շեկոյան էդուարդի» Ա/Ձ-ի կողմից պայմանագիր կնքելու ժամկետն (10 աշխատանքային օրը), ուստի «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով գնման ընթացակարգի հանձնաժողովի որոշմամբ՝ «Գոռ Շեկոյան էդուարդի» Ա/Ձ-ն զրկվել է պայմանագիր կնքելու իրավունքից և «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով գնման ընթացակարգի N 12 չափաբաժինը հայտարարվել է չկայացած՝ «Գնումների մասին» ՀՀ օրենքի 37-րդ հոդվածի 1-ին մասի 4-րդ կետի համաձայն:

Հաշվի առնելով վերոգրյալը, խնդրում եմ սահմանված կարգով «Գոռ Շեկոյան էդուարդի» Ա/Ձ-ին ներառել գնումների գործընթացին մասնակցելու իրավունք չունեցող մասնակիցների ցուցակում:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով հայտարարված գնման ընթացակարգի շրջանակներում «Գոռ Շեկոյան» Ա/Ձ-ի տվյալները՝ համապատասխան հիմքերով:

3. «Գոռ Շեկոյան» Ա/Ձ-ի ներկայացրած փաստարկները և դիրքորոշումը.

Բողոքներ քննող անձը 14.09.2021թ.-ին գրությամբ դիմել է «Գոռ Շեկոյան» Ա/Ձ-ին՝ հնարավորություն տալով ՀՀ ֆինանսների նախարարության կողմից 13.09.2021թ.-ի թիվ 1/26-1/14790-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստի տեղի, օրվա և ժամի մասին, ներկայացել է հրավիրված

նիստերին՝ ներկայացնելով բանավոր դիրքորոշում նախաձեռնված ընթացակարգի հիմքերի և հիմնավորումների վերաբերյալ:

4. ՍՑ-ԼՕ-2021/238 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ արդարադատության նախարարության քրեակատարողական ծառայության (այսուհետ նաև՝ Պատվիրատու) կողմից քրեակատարողական ծառայողի շապիկ դատապարտյալների հանդերձանք և անկողնային պարագաների ձեռքբերման նպատակով 26.07.2021թ.-ին հայտարարվել է «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով էլեկտրոնային աճուրդի ընթացակարգ (այսուհետ նաև՝ Աճուրդ կամ Ընթացակարգ):

ii. Ընթացակարգին մասնակցելու նպատակով հայտ է ներկայացրել նաև «Գոռ Շեկոյան» Ա/Ձ-ն:

iii. «Գոռ Շեկոյան» Ա/Ձ-ն թիվ 1 հավելվածով՝ էլեկտրոնային աճուրդի ընթացակարգին մասնակցելու դիմում-հայտարարությամբ հայտարարել և հավաստել է, որ բավարարում է «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով գնանշման հարցման հրավերով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, ընթացակարգի հրավերով սահմանված կարգով և ժամկետում ներկայացնել որակավորման ապահովում:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 04.08.2021թ.-ի նիստի թիվ 2 արձանագրության համաձայն՝ 12-րդ չափաբաժնի մասով նվազագույն գնային առաջարկ է ներկայացրել «Գոռ Շեկոյան» Ա/Ձ-ն:

v. Հանձնաժողովի 06.08.2021թ.-ին նիստի թիվ 3 արձանագրության համաձայն՝ 12-րդ չափաբաժնի մասով «Գոռ Շեկոյան» Ա/Ձ-ի հայտը գնահատվել է բավարար:

vi. 06.08.2021թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն (այսուհետ նաև՝ Հայտարարություն):

vii. Հայտարարության համաձայն՝ գնման ընթացակարգի 12-րդ չափաբաժնի մասով ընտրած /հաղթող/ մասնակից է ճանաչվել «Գոռ Շեկոյան» Ա/Ձ-ն և սահմանվել է անգործության ժամկետ՝ 10 օրացուցային օր:

viii. Հանձնաժողովի 06.09.2021թ.-ի նիստի թիվ 4 արձանագրության համաձայն՝ էլեկտրոնային աճուրդի 12 չափաբաժնի մասով հաղթող մասնակից է ճանաչվել «Գոռ Շեկոյան Էդուարդի» Ա/Ձ-ն: Ընթացակարգի անգործության ժամկետն ավարտվել է 17.08.2021թ.-ին ժամը 00:00-ին, ինչով պայմանավորված Մասնակցին Պատվիրատուի կողմից պայմանագիր կնքելու ծանուցումը և կնքվելիք պայմանագրի նախագիծն, էլեկտրոնային համակարգի միջոցով, ուղարկվել է 17.08.2021թ.-ին՝ անգործության ժամկետի ավարտից անմիջապես հետո: 01.09.2021թ.-ին լրացել է «Գոռ Շեկոյան Էդուարդի» Ա/Ձ-ի կողմից պայմանագիր կնքելու ժամկետն, ուստի վերջինս զրկվել է պայմանագիր կնքելու իրավունքից, իսկ Ընթացակարգի 12 չափաբաժինը հայտարարվել է չկայացած:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 13.09.2021թ.-ի թիվ 1/26-1/14790-2021 գրությամբ «Գոռ Շեկոյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագիր կնքելուց:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա

ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 18.05.2017թ.-ի թիվ 534-Ն հաստատված «Գնումների գործընթացի կազմակերպման» կարգի 10-րդ կետի համաձայն՝ էլեկտրոնային աճուրդով գնումների կատարման և ընտրված մասնակցի հետ պայմանագրի կնքման ժամանակ գործում են Հայաստանի Հանրապետության կառավարության 2017 թվականի մայիսի 4-ի թիվ 526-Ն որոշման 1-ին կետի 1-ին ենթակետով հաստատված կարգով նախատեսված կարգավորումները.....:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ և 13-րդ ենթակետերի համաձայն՝ ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը: Ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթը: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Վերոնշյալ դրույթների համակարգված վերլուծության արդյունքում Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն, որակավորման և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում ներկայացված գնային առաջարկի չափով որակավորման ապահովում, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում, ինչպես նաև չներկայացնելով պայմանագրի ապահովում, վերջինս զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը,

ինչպես նաև վերջինիս գործողությունները (անգործությունը) գնահատվում են որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը, ինչպես նաև պատվիրատուին չներկայացնելով պայմանագրի օրինակը և/կամ ապահովումը զրկվել է պայմանագրի կնքելու իրավունքից:

Սույն գործի փաստերի հիման վրա՝ Բողոքներ քննող անձն արձանագրում է, որ ՀՀ արդարադատության նախարարության քրեակատարողական ծառայության կողմից քրեակատարողական ծառայողի շապիկ դատապարտյալների հանդերձանք և անկողնային պարագաների ձեռքբերման նպատակով 26.07.2021թ.-ին հայտարարված «ՀՀ ԱՆ ՔԿԾ-ԷԱԾԱՊՁԲ-21/3» ծածկագրով էլեկտրոնային աճուրդի ընթացակարգի գնահատող հանձնաժողովի 04.08.2021թ.-ի նիստի թիվ 2 արձանագրությամբ արձանագրվել է, որ 12-րդ չափաբաժնի մասով նվազագույն գնային առաջարկ է ներկայացրել «Գոռ Շեկոյան» Ա/Ձ-ն, իսկ թիվ 3 արձանագրությամբ վերջինիս հայտը հայտը գնահատվել է բավարար, ինչով պայմանավորված 06.08.2021թ.-ին պայմանագրի կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է պայմանագրի կնքելու որոշման մասին հայտարարություն, որի համաձայն՝ գնման ընթացակարգի 12-րդ չափաբաժնի մասով ընտրված /հաղթող/ մասնակից է ճանաչվել «Գոռ Շեկոյան» Ա/Ձ-ն և սահմանվել է անգործության ժամկետ՝ 10 օրացուցային օր: Սակայն Հանձնաժողովի 06.09.2021թ.-ի նիստի թիվ 4 արձանագրությամբ արձանագրվել է, որ էլեկտրոնային աճուրդի 12 չափաբաժնի մասով հաղթող մասնակից ճանաչված «Գոռ Շեկոյան Էդուարդի» Ա/Ձ-ին Պատվիրատուի կողմից պայմանագրի կնքելու ծանուցումը և կնքվելիք պայմանագրի նախագիծն, էլեկտրոնային համակարգի միջոցով, ուղարկվել է 17.08.2021թ.-ին՝ անգործության ժամկետի ավարտից անմիջապես հետո: 01.09.2021թ.-ին լրացել է «Գոռ Շեկոյան Էդուարդի» Ա/Ձ-ի կողմից պայմանագրի կնքելու ժամկետն, ինչով պայմանավորված վերջինս զրկվել է պայմանագրի կնքելու իրավունքից, իսկ Ընթացակարգի 12 չափաբաժինը հայտարարվել է չկայացած:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը

ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա՝ Բողոքներ քննող անձն եզրահանգում է, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Ընդ որում, Բողոքներ քննող անձը հարկ է համարում փաստել, որ «Գոռ Շեկոյան» Ա/Ձ-ն թիվ 1 հավելվածով՝ էլեկտրոնային աճուրդի ընթացակարգին մասնակցելու դիմում-հայտարարությամբ հայտարարել և հավաստել է, որ բավարարում է «ՀՀ ԱՆ ՔԿԾ-ԷԱՃԱՊՁԲ-21/3» ծածկագրով գնանշման հարցման հրավերով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, ընթացակարգի հրավերով սահմանված կարգով և ժամկետում ներկայացնել որակավորման ապահովում:

Վերոնշյալներով պայմանավորված՝ Բողոքներ քննող անձը հանգում է այն եզրակացության, որ «Գոռ Շեկոյան» Ա/Ձ-ն, որպես ընտրված /հաղթող/ մասնակից, հրավերով սահմանված կարգով և ժամկետներում չներկայացնելով պայմանագիրը, որակավորման և պայմանագրի կատարման ապահովումները, խախտել է գնման

գործընթացի շրջանակում ստանձնած պարտավորություն, ինչպես նաև հրաժարվել է պայմանագիր կնքելուց:

Ուստի, հիմք ընդունելով «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթները, Մասնակցին պետք է ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

1. ՀՀ ֆինանսների նախարարության կողմից 13.09.2021թ.-ի թիվ 1/26-1/14790-2021 գրությամբ «Գոռ Շեկոյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2021/238 ծածկագրով ընթացակարգը բավարարել:

2. «Գոռ Շեկոյան» Ա/Ձ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ՝**



ԼԵՎՈՆ ՕՍԿԱՆՅԱՆ